

## ODLUKA

o uvjetima i načinu organizacije sportsko - rekreativnog ribolova  
na vodenim tokovima u području Nacionalnog parka „Una“ za 2025. godinu

### Predmet

#### Član 1.

Ovom Odlukom uređuju se pitanja od značaja za organizaciju sportsko – rekreativnog ribolova na vodenim tokovima u području Nacionalnog parka „Una“ Bihać za 2025. godinu.

### Dozvoljeni načini ribolova

#### Član 2.

Dozvoljeni načini ribolova (tehnika ribolova, alati i mamci) na vodenim tokovima u području Nacionalnog parka „Una“ u uspostavljenim revirima su:

1. Ribolov mušičarenjem (fly fishing) po principu „ulovi i pusti“ sa upotrebom udice bez kontra kuke,
2. Ribolov upotrebom vodene kuglice (tzv. Wasserkugle) sa najviše 3 (tri) umjetna mamca-suhe mušice,
3. Ribolov varaličarenjem sa blinkerom i drugim umjetnim mamcima tzv. Špinjanjem.

### Uspostavljeni ribolovni reviri na vodenim tokovima

#### Član 3.

Organizacija sportsko - rekreativnog ribolova može se vršiti u 6 (šest) osnovnih revira i 1 (jedan) posebni revir, a to su:

1. Revir br. 1 „Martin Brod“ namijenjen isključivo za mušičarenje (tzv. fly fishing) uz upotrebu udice bez kontra kuke, a revir obuhvata područje na rijeci Unac koje počinje 100 (stotinu) metara uzvodno od mosta kod manastira Rmanj, te se nastavlja nizvodno rijekom Unac do lokaliteta Sastavci gdje se Unac ulijeva u rijeku Unu i dalje niz vodotok rijeke Une do tačke nizvodno od zaseoka Palučci na rijeci Uni. Sveukupna dužina ovog revira je 7,1 km.  
*- Poseban revir „Unac“ nalazi se u sklopu revira br. 1. „Martin Brod“ te se proteže od tačke koja se nalazi 100 m uzvodno od mosta na rijeci Unac, nizvodno do Sastavaka tj. ušća Unca u Unu, te dalje nizvodno kratkim dijelom toka rijeke Une do tzv. Srušenog mosta gdje Posebni revir završava. Za Posebni revir „Unac“ određuje se posebna cijena ribolovne dozvole utvrđena u članu 8. ove Odluke.*
2. Revir br. 1A „Gečet“ je kombinirani revir namijenjen za ribolov mušičarenjem, kao i metodom upotrebe vodene kugle (tzv. wasserkugle) sa 3 (tri) suhe mušice ili/i ribolov varaličarenjem sa tzv. blinkerom ili drugim umjetnim mamcima tzv. špinjanjem.  
Ovaj revir obuhvata područje od tačke nizvodno od zaseoka Palučci na rijeci Uni, nizvodno do slapa koji se nalazi 150 (stotinupedeset) metara uzvodno od velikog mosta u naseljenom mjestu Kulen Vakuf. Dužina revira je 3,4 km.
3. Revir br. 1B „Kulen Vakuf“ namijenjen samo za mušičarenje (fly fishing). Obuhvata područje na rijeci Uni od slapa koji se nalazi 150 (stotinupedeset) metara uzvodno od velikog mosta u naseljenom mjestu Kulen Vakuf, te se proteže nizvodno kroz naseljeno mjesto Kulen Vakuf do mosta koji preko rijeke Une vodi do naseljenih mjesta Klisa i Ostrovica. Sveukupna dužina ovog revira je 1,5 km.
4. Ribolovni revir br. 2 „Klisa – Čelije“ namijenjen za ribolov upotrebom vodene kugle (tzv. wasserkugle) sa 3 (tri) suhe mušice ili ribolov varaličarenjem sa blinkerom ili drugim umjetnim mamcima tzv. špinjanjem. Obuhvata područje na rijeci Uni od tačke tzv. „Oćukine kuće“ (od zone A stalne zabrane), nizvodno rijekom Unom do nekadašnjeg visećeg mosta kod željezničke stanice Štrbački buk. Dužina revira je 14,5 km.

5. Ribolovni revir br. 4 „Dvoslap“ namijenjen za ribolov upotrebom vodene kugle (tzv. wasserkugle) sa 3 (tri) suhe mušice ili ribolov varaličarenjem sa blinkerom ili drugim umjetnim mamcima tkz. špinjanjem. Revir obuhvata područje na rijeci Uni od Bisovačkog mosta (željeznički most-granica sa Republikom Hrvatskom) nizvodno tokom rijeke Une do slapa Dvoslap (gornji slap). Dužina revira je 3,3 km.
6. Ribolovni revir br. 5 „Očigrije“ namijenjen za ribolov upotrebom vodene kugle (tzv. wasserkugle) sa 3 (tri) suhe mušice ili ribolov varaličarenjem sa blinkerom ili drugim umjetnim mamcima tkz. špinjanjem. Obuhvata područje na rijeci Uni uzvodno od Martin Broda, tačnije od drvenog mosta na lokalitetu Zamršten (nalazi se uzvodno od željezničkog mosta) uzvodno tokom rijeke Une do tačke na rijeci koja je u ravni sa raskrsnicom za Očigrije tj. podvožnjakom ispod željezničke pruge. Dužina revira je 1,7 km.

### **Stalne zabrane ribolova na vodenim tokovima**

#### **Član 4.**

U ostalom dijelu vodenih tokova na području Nacionalnog parka „Una“ u 2025. godini uspostavlja se 7 (sedam) zona stalne zabrane ribolova bilo koje vrste i to su:

1. A-zona, koja obuhvata područje od mosta koji vodi za naseljeno mjesto Klisa nizvodno tokom rijeke Une u dužini od 500 (petsto) metara do lokaliteta tzv. „Oćukina kuća“.
2. B-zona, koja obuhvata područje od nekadašnjeg visećeg mosta kod željezničke stanice Štrbački buk nizvodno do lokaliteta Bisovački most (željeznički most uzvodno od Troslapa).
3. C-zona u dužini 400 (četiristotine) metara. Počinje od tačke koju čini sjeverna granica Nacionalnog parka „Una“ na sedrenoj adi nizvodno od Dvoslapa, te se proteže uzvodno 400 m do gornjeg slapa na Dvoslapu.
4. D-zona, koja obuhvata područje koje počinje 100 (stotinu) metara uzvodno od mosta kod manastira Rmanj na rijeci Unac i proteže se uzvodno do južne granice Nacionalnog parka „Una“ u pravcu općine Drvar-lokalitet Berek.
5. E-zona, koja obuhvata područje od lokaliteta Sastavci gdje se rijeka Unac ulijeva u rijeku Unu u naseljenom mjestu Martin Brod, uzvodno vodotokom rijeke Une do drvenog mosta na lokalitetu Zamršten (nalazi se uzvodno od željezničkog mosta).
6. F-zona obuhvata područje od ribolovnog revira „Očigrije“ odnosno tačke na rijeci Uni koja je u ravni sa raskrsnicom za selo Očigrije tj. podvožnjakom ispod željezničke pruge, uzvodno do ušća rječice Krke u rijeku Unu, te nastavlja uzvodno cijelim tokom rječice Krka do njenog izvora,
7. G-zona koja obuhvata tok rječice Ostrovica od njenog izvora do ušća gdje se ulijeva u rijeku Unu do (dužine 850 m).

### **Označavanje revira**

#### **Član 5.**

Utvrđeni reviri i zone zabrane biti će označeni vidljivo istaknutim tablama na granicama revira i zona stalne zabrane ribolova.

### **Mogućnost dnevnog izlova ribe**

#### **Član 6.**

- a) U ribolovnim revirima br. 1 „Martin Brod i br. 1B „Kulen Vakuf“ gdje se sportsko-rekreativni ribolov obavlja isključivo metodom mušičarenja (fly fishing) nije dozvoljeno izlovljavanje ribe i ribolov vrši isključivo po principu „ulovi i pusti“. Ovo pravilo vrijedi za sve vrste riba koja se lovi pa tako i za alohtonu vrstu kalifornijsku pastrmku.

- b) U ribolovnim revirima br. 2 „Klisa – Čelije“, br. 4 „Dvoslap“ i br. 5 „Očigrije“ gdje se sportsko-rekreativni ribolov obavlja isključivo metodom korištenja vodene kugle (tzv. wasserkugle) sa 3 (tri) suhe mušice (umjetna mamca) ili varaličarenjem, dozvoljava se:
- sportskom ribolovcu da dnevno izlovi maksimalno 2 (dva) primjerka ribe koja obitava u području revira i koja po primjerku ne može biti manja od 30 (trideset) cm i veća od 40 (četrdeset) cm za primjerke pastrmke i lipljena. Primjerke koji su manji od 30 cm ili veći od 40 cm, sportski ribolovac je obavezan vratiti u vodu.
- c) U ribolovnom reviru br. 1A „Gečet“ uspostavlja se poseban režim ribolova na način da se isti koristi kombinirano: od ponedjeljka do četvrtka ribolov u reviru je dozvoljen isključivo metodom mušičarenja (fly fishing) po principu „ulovi i pusti“, a od petka do nedjelje ribolov u reviru je dozvoljen isključivo metodom korištenja vodene kugle (tzv. wasserkugle) sa 3 (tri) suhe mušice (umjetna mamca) ili varaličarenjem.

## Režim ribolova

### Član 7.

**U reviru br. 1 „Martin Brod“** gdje se sportsko-rekreativni ribolov obavlja samo metodom mušičarenja (flyfishing) u 2025. godini uspostavlja se režim ribolova u vremenskom periodu:

- od 01. maja do 26. oktobra - svaki dan

Posebni revir „Unac“ (dužine 1,0 km) koji je u sastavu revira br. 1 obuhvata područje na rijeci Unac koje počinje 100 (stotinu) metara uzvodno od mosta kod manastira Rmanj, te se nastavlja nizvodno rijekom Unac do lokaliteta Sastavci gdje se Unac ulijeva u rijeku Unu i kratko nastavlja rijekom Una do tzv. Srušenog mosta, gdje se u 2024. godini uspostavlja režim ribolova u vremenskom periodu:

- od 01. marta do 26. oktobra – svaki dan

**U reviru br. 1A „Gečet“** gdje se sportsko-rekreativni ribolov se vrši kombinovano, u 2025. godini uspostavlja se režim ribolova u vremenskom periodu:

- od 01. maja do 26. oktobra za potočnu i kalifornijsku pastrmku i lipljen i to petkom, subotom i nedjeljom isključivo metodom vodene kugle (tzv. wasserkugle) sa 3 (tri) suhe mušice (umjetna mamca) ili/i varaličarenjem,
- od 01. maja do 26. oktobra i to ponedjeljkom, utorkom, srijedom i četvrtkom isključivo metodom mušičarenja (flyfishing).

**U reviru br. 1B „Kulen Vakuf“** gdje se sportsko-rekreativni ribolov obavlja samo metodom mušičarenja (fly fishing), u 2025. godini uspostavlja se režim ribolova u vremenskom periodu:

- od 01. maja do 26. oktobra - svaki dan

**U reviru br. 2 „Klisa-Čelije“** gdje se sportsko-rekreativni ribolov obavlja metodom korištenja vodene kugle (Wasserkugle) sa 3 (tri) suhe mušice (umjetna mamca) ili varaličarenjem u 2025. godini uspostavlja se režim ribolova u vremenskom periodu:

- od 01. marta do 28. septembra za potočnu pastrmku
- od 01. marta do 26. oktobra za kalifornijsku pastrmku
- od 01. maja do 26. oktobra za lipljen

i to u dane petkom, subotom i nedjeljom, a ostalim danima ribolov je zabranjen.

**U reviru br. 4 „Dvoslap“** gdje se sportsko-rekreativni ribolov obavlja metodom korištenja vodene kugle (Wasserkugle) sa 3 (tri) suhe mušice (umjetna mamca) ili varaličarenjem u 2025. godini uspostavlja se režim ribolova u vremenskom periodu:

- od 01. marta do 28. septembra za potočnu pastrmku
- od 01. marta do 26. oktobra za kalifornijsku pastrmku
- od 01. maja do 26. oktobra za lipljen

i to u dane petkom, subotom i nedjeljom, a ostalim danima ribolov je zabranjen.

**U reviru br. 5 „Očigrije“** gdje se sportsko-rekreativni ribolov obavlja metodom korištenja vodene kugle (tzv. wasserkugle) sa 3 (tri) suhe mušice ili ribolov varaličarenjem sa blinkerom ili drugim umjetnim mamcima tzv. špinjanjem u 2025. godini uspostavlja se režim ribolova u vremenskom periodu:

- od 01. marta do 28. septembra za potočnu pastrmku
- od 01. marta do 26. oktobra za kalifornijsku pastrmku
- od 01. maja do 26. oktobra za lipljen

i to u dane petkom, subotom i nedjeljom, a ostalim danima ribolov je zabranjen.

### Vrste i cijene ribolovnih dozvola

#### Član 8.

U revirima br. 1 „Martin Brod“, br. 1B „Kulen Vakuf“ br. 1A „Gečet“ (kombinovani) u kojima se sportsko-rekreativni ribolov vrši metodom mušičarenja (fly fishing), za 2025. godinu utvrđuje se visina novčane naknade po slijedećim kategorijama:

- 20,00 (dvadeset) KM dnevna dozvola za državljane Bosne i Hercegovine članove ribolovnih udruženja u Bosni i Hercegovini, uz dokaz o redovnom članstvu i ličnu kartu/pasoš,
- 50,00 (pedeset) KM dnevna dozvola za turiste sportske ribolovce,
- 120,00 (stotinudvadeset) KM trodnevna dozvola za turiste - sportske ribolovce,
- 180,00 (stotinuosamdeset) KM petodnevna dozvola za turiste - sportske ribolovce.

Izuzetak je posebni revir „Unac“ koji se nalazi u sastavu revira br. 1 „Martin Brod“, a za koji se utvrđuje visina novčane naknade za ribolovne dozvole:

- 60,00 (šezdeset) KM dnevna dozvola za sve sportske ribolovce,
- 140,00 (stotinučetdeset) KM trodnevna dozvola za sve sportske ribolovce,
- 200,00 (dvjesto) KM petodnevna dozvola za sve sportske ribolovce.

U revirima br. 1A „Gečet“ (kombinovani), br. 2 „Klisa-Čelije“, br. 4 „Dvoslap“ i br. 5 „Očigrije“ u kojima se sportsko-rekreativni ribolov vrši metodom korištenja vodene kugle (tzv. wasserkugle) sa 3 (tri) suhe mušice (umjetna mamca) ili/i varaličarenjem, utvrđuje se visina novčane naknade u slijedećim iznosima:

- 25,00 (dvadesetpet) KM (varaličarenje i mušičarenje) dnevna dozvola za ribolovce državljane BiH, članove udruženja sportskih ribolovaca u Bosni i Hercegovini, uz dokaz o redovnom članstvu i ličnu kartu/pasoš,
- 50,00 (pedeset) KM dnevna dozvola za turiste – sportske ribolovce,
- 120,00 (stotinudvadeset) KM trodnevna dozvola za turiste - sportske ribolovce,
- 120,00 (stotinudvadeset) KM godišnja dozvola (30 dnevnih izlazaka na vodu u toku ribolovne sezone) za državljane BiH članove udruženja sportskih ribolovaca u Bosni i Hercegovini, uz dokaz o redovnom članstvu i ličnu kartu/pasoš.
- 70,00 (sedamdeset) KM godišnja dozvola (30 dnevnih izlazaka na vodu u toku ribolovne sezone) za državljane BiH članove udruženja sportskih ribolovaca u Bosni i Hercegovini uz dokaz o redovnom članstvu i ličnu kartu/pasoš, za slijedeće kategorije:
  - Ratni vojni invalidi uz predočenje dokumenta kojim dokazuju status,
  - Penzioneri uz predočenje dokumenta kojim dokazuju status,
  - Porodice šehida i poginulih boraca uz predočenje dokumenta kojim dokazuju status,

- Demobilisani borci koji su radno sposobni i koji se nalaze na evidenciji nezaposlenih JU "Zavod za zapošljavanje USK-a" uz predočenje dokaza o statusu demobilisanog borca i nezaposlene osobe,
- 80,00 (osamdeset) KM godišnja dozvola (30 dnevnih izlazaka na vodu u toku ribolovne sezone) za domicilno stanovišтво u području Nacionalnog parka "Una" uz predočenje dokaza o mjestu prebivališta (CIPS) ili vlasništvu/suvlasništvu nad nekretninom u području Nacionalnog parka "Una".
- 50,00 (pedeset) KM godišnja dozvola (30 dnevnih izlazaka na vodu u toku ribolovne sezone) za domicilno stanovišтво iz područja Nacionalnog parka "Una" uz predočenje dokaza o mjestu prebivališta (CIPS) ili vlasništvu/suvlasništvu nad nekretninom u području Nacionalnog parka "Una" i to:
  - Ratni vojni invalidi uz predočenje dokumenta kojim dokazuju status,
  - Penzioneri uz predočenje dokumenta kojim dokazuju status,
  - Porodice šehida i poginulih boraca uz predočenje dokumenta kojim dokazuju status,
  - Demobilisani borci koji su radno sposobni i koji se nalaze na evidenciji nezaposlenih JU "Zavod za zapošljavanje USK-a" uz predočenje dokaza o statusu demobilisanog borca i nezaposlene osobe,
- 45,00 (četrestpet) KM počasnı članovi USR „Una“ starosti preko 65 (šezdesetpet) godina uz predočenje lične karte i original dokumenata kojim dokazuju status počasnog člana.

### **Prodaja ribolovnih dozvola**

#### Član 9.

Prodaja ribolovnih dozvola se vrši na više lokacija kako slijedi:

- Godišnje ribolovne dozvole se prodaju isključivo u upravi JP Nacionalni park „Una“ d.o.o.,
- Dnevne, trodnevne i petodnevne ribolovne dozvole se prodaju na info tački u Kulen Vakufu (Unska bb), na ulazu br. 5 „Milančev buk“ u Martin Brodu i u upravi JP Nacionalni park „Una“ d.o.o..

### **Sankcije**

#### Član 10.

Kršenje odredaba ove Odluke i Pravila o uvjetima i načinu organizacije sportsko – rekreativnog ribolova na vodenim tokovima u području Nacionalnog parka „Una“, pored pokretanja prekršajnog postupka prema počiniocu kod nadležnih tijela, povlači i mogućnost izricanja sankcije od strane nadležnih tijela JP Nacionalni park "Una" d.o.o. Bihać prema prekršiocima, koja se ogleda u privremenoj ili trajnoj zabrani ribolova na području Nacionalnog parka "Una" Bihać, bez mogućnosti povrata novčanih sredstva uplaćenih za kupovinu ribolovne dozvole.

Sankcija prema prekršiocu koja se ogleda u privremenoj zabrani do 12 mjeseci koju donosi Uprava ili trajnoj zabrani ribolova na vodotocima u Nacionalnom parku Una koju donosi Nadzorni odbor na prijedlog Uprave.

#### Član 11.

Lica koja nadzornici JP Nacionalni park "Una" d.o.o. Bihać zateknu u kršenju propisa o ribolovu na vodenim tokovima u području Nacionalnog parka „Una“, moguće je izricanje trajne zabrane ribolova na vodenim tokovima u području Nacionalnog parka "Una" od strane Uprave JP Nacionalni park "Una" d.o.o. Bihać u slučajevima kada:

- obavljaju sportski ribolov bez ribolovne dozvole,
- obavljaju sportski ribolov zabranjenim sredstvima i alatima,
- love i uništavaju riblju mlađ i primjerke veće biološke vrijednosti u vrijeme lovostaja;
- love ribu harpunom, ostima i drugim zabranjenim sredstvima i alatima, vatrenim oružjem ili hemijskim i drugim sredstvima koja ubijaju i truju ili omamljuju ribu;
- love ribu neposredno rukom;

- ometaju postavljanje znakova kojima se obilježava ribolovno područje, prirodno riblje mrijestilište, ribnjak ili ribolovna voda za ribolov pod posebnim uslovima i mjestima na kojima je ribolov zabranjen, kao i vrše oštećenje i premještanje znakova;
- ribolove noću.

#### Član 12.

Lica koja su u toku 2024. godine sankcionisana zbog kršenja ribolovnih propisa u ribolovnim revirima Nacionalnog parka "Una", zabranjuje se ribolov u revirima NP Una na period od godinu dana odnosno ta lica neće moći ishodovati ribolovne dozvole za 2025. godinu.

#### Član 13.

Sastavni dio ove Odluke čine Pravila o uvjetima i načinu organizacije sportsko – rekreativnog ribolova na vodenim tokovima u području Nacionalnog parka „Una“ za 2025. godinu.

#### Član 14.

Ova Odluka stupa na snagu danom donošenja, a primjenjivaće se za kalendarsku 2025. godinu.